



ILIDŽA

INFORMATIVNI BILTEN OPĆINE ILIDŽA



Ilidžanski festival

Pobjednica Festivala Amna Aganović



Izveštaj o izvršenju Budžeta općine Ilidža za prvih šest mjeseci

Općinsko vijeće Ilidža na 41. sjednici 3. augusta 2016. godine u Multifunkcionalnoj sali usvojilo je Izveštaj o izvršenju Budžeta Općine Ilidža za period 1. januara – 30. juni 2016. godine.

Ukupno ostvareni prihodi i primici u ovom periodu iznose 12.051.638,03 KM, a rashodi i izdaci 11.063.757,37.KM

Razlika između ostvarenih prihoda i primitaka i rashoda i izdataka je 987.880,66 KM i prenosi se u budžet za naredni period.

Potrebno unaprijediti stanje vodovodne i kanalizacione mreže

Razmatrajući Informaciju o stanju vodovodne i kanalizacione mreže na području općine Ilidža Vijeće je donijelo nekoliko zaključaka u cilju unaprijeđenja stanja u oblasti vodosnabdijevanja i odvodnje otpadnih voda. Neophodno je osigurati pravo općine da učestvuje u donošenju Godišnjeg programa rada KJKP "Vodovod i kanalizacija", kao i da se u fazi donošenja Godišnjeg programa koordiniraju aktivnosti na planiranju održavanja i izgradnje vodovodne i kanalizacione mreže sa planiranjem održavanja izgradnje puteva na području općine. Potrebno je i da se pojača rad građevinske i komunalne inspekcije u oblasti izgradnje septičkih jama i ispuštanja fekalija iz septičkih jama u otvorene kanale i vodotoke. Općinsko vijeće Ilidža zaključilo je da bi KJKP "Vodovod i kanalizacija" bez uslovljavanja trebalo da sklapa ugovore o crpljenju septičkih jama sa vlasnicima navedenih objekata, da KJKP "Vodovod i kanalizacija" hitno dogovori modus prijema vodovodne i kanalizacione mreže, kao i da se sa KJKP "Vodovod i kanalizacija" hitno dogovori rekonstrukcija dotrajale vodovodne i kanalizacione mreže u Industrijskoj zoni Famosa. Obzirom da općina ima značajne turističke potencijale neophodno je u narednim godinama planirati veća finansijska sredstva za izgradnju kanalizacione mreže, zajedno sa nadležnim ministarstvima KS.

Prijedlozi regulisanja imovinsko-pravnih odnosa

Općinsko vijeće Ilidža je donijelo i prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Lejla Nuhodžić, Fikreta Erovića, Ismeta Zornića i Ibrahima Zornića. Također, Vijeće je donijelo i prijedloge rješenja o rješavanju imovinsko-pravnih odnosa u svrhu legalizacije stambeno-poslovnih objekata po zahtjevima Zijada Čenanovića i Nermina Hukića, te prijedloge rješenja o rješavanju imovinsko-pravnih odnosa u svrhu legalizacije poslovnih objekata na ime Sretko Tomić i Zahid Mujanović. Vijeće je donijelo i prijedlog za rješavanje imovinsko-pravnih odnosa u svrhu legalizacije garaže po zahtjevu Amira Hamzića, te Prijedlog odluke o utvrđivanju javnog interesa J.P. Međunarodni aerodrom Sarajevo.

Usvojen je i prijedlog odluke o neposrednoj pogodbi za prodaju neizgrađenog građevinskog zemljišta firmi Classic d.o.o Sarajevo, te prijedlog odluke o prestanku statusa nepokretnosti u općoj upotrebi firmi El Sagir d.o.o Ilidža kao i prijedlog odluke o neposrednoj pogodbi za prodaju neizgrađenog građevinskog zemljišta ovom preduzeću, kao i prijedlog odluke o neposrednoj pogodbi za prodaju neizgrađenog građevinskog zemljišta Kuwait Investment company.

Utvrđena rang lista kandidata za Nadzorni odbor JP "Ilidža"

Općinsko vijeće Ilidža utvrdilo je rang listu kandidata za imenovanje predsjednika i dva člana Nadzornog odbora JP "Ilidža" i dostavit će je skupštini ovog preduzeća koja je nadležna da izvrši navedena imenovanja. Kandidati su: Sadat Kovačević, Midhat Karahasan, Nedžad Suljić, Halid Kurtović i Admir Tatarin.

Četvrta viteška brigada 27. jula 2016. obilježila je 24 godine od svog osnivanja. Brigada je branila i odbranila kapije grada Sarajeva i temelje ustavnosti BiH.

Obilježene 24 godine od formiranja Četvrte viteške brigade



Onog trenutka kada su se strahote rata nadvile nad BiH i obuhvatile i općinu Ilidža bez dvoumljenja narod Hrasnice, Sokolović-Kolonije i Butmira stavio je na raspolaganje svoje živote, jedinoj domovini BiH, ne tražeći ništa zauzvrat. Bez naoružanja i formalnih znanja o vještini ratovanja srcem su branili i odbranili vlastiti dom. Stali su sinovi, očevi, majke i sestre na bedeme ovih naselja. Naoružani ljubavlju prema svojoj domovini uspostavili su odbranu i sačuvali sve ono što im je oduvijek i pripadalo. Tako je i nastala Četvrta viteška brigada, a Udruženje boraca formirano danas obećava da cilj za koji su ginuli najbolji sinovi, čuvat će od zaborava. Brojne delegacije položile su cvijeće ispred centralnog spomen obilježja kod zgrade općine. Održana je i svečana sjednica Općinskog vijeća Ilidža, a postavljena je i izložba ratnih fotografija pripadnika ove brigade u holu općine Ilidža.

“Ovdje su živjeli i živjet će Bošnjaci, Hrvati, Srbi, Romi čineći čvrstu, tada, Četvrtu vitešku brigadu u kojoj je svaki pripadnik dao maksimum. Zajedno su ginuli vjerujući jedni drugima, ali sigurni u sretniju budućnost. Time smo mi stavili pečat na ono što je Ilidža danas. Mi smo poznati po miroljubivosti, po toleranciji i zajedničkom životu, mi smo danas, Ilidža sigurna, stabilna i poželjna općina za život. Pobjednički duh zajedništva smo gradili u periodu rata i ugradili ga u stvaranju današnje naše općine. Svjesni smo da bez više od 10.000 pripadnika Četvrte viteške brigade, bez njihove želje i odricanja, bez 425 poginulih, 1600 ranjenih, bez molitvi majki, sestara i očeva ne bi bilo Ilidže” rekao je Emir Redžović, predsjednik Udruženja Četvrte viteške brigade, nekadašnji komandant 104. Viteške brigade i zamjenik komandanta Četvrte viteške brigade.

On je dodao da 425 mrtvih ne smiju nikad biti zaboravljeni.

“Njima danas odajemo počast, a preživjelim borcima dugujemo zahvalnost. Mi borci ne tražimo ništa, mi nismo teret. Mi želimo demokratsku, evropsku BiH, ravnopravnu za sve građane i to je naš cilj”, naglasio je Redžović.

“Brigada je svoju historiju ispisala krvlju. Ponosni smo što smo imali ovakvu brigadu, koja je ugradila dio sebe u temelje savremene, moderne i slobodne BiH. Ov-

dje je svako mogao učestvovati u odbrani, a šta mi možemo učiniti za ljude koji su dali živote za odbranu države, za obranu časti, odbranu svega onog sto im smeta? Stojimo im na raspolaganju. Moramo se sjećati, a najvrijednija stvar jeste da je sala puna danas, da nas ima ovoliko, da jedni druge gledamo i da jedni na druge računamo. Ova brigada je bila i na Treskavici, Sanskom Mostu, Bihaću, Nišićkoj visoravni, gdje god je trebalo. Ovaj narod ispod Igmana neće nikad zaboraviti zasluge sinova brigade” rekao je, između ostalog, načelnik Općine Ilidža prof. dr. Senaid Memić.

Predsjedavajući Općinskog vijeća Ilidža Muhamed Omerović zahvalio je svima koji su došli ističući da je održavanje sjednice dug prema šehidima.

“Općinsko vijeće i oni koji vode ovu općinu imat će obavezu da Hrasnicu i cijelu Ilidžu postave na veći nivo pažnje Sarajeva. Kao općina ćemo u saradnji sa direktorima naših škola, Udruženjem Četvrte viteške brigade napraviti projekat prestavljanja ratnog puta i herojske borbe Četvrte viteške brigade u periodu od 1992-1995. kako bi našoj djeci objasnili kako su se branili i odbranili ovi krajevi. Svakodnevno se moramo sjećati najboljih sinova naše domovine te uvažavati njihove porodice” izjavio je Muhamed Omerović, predsjedavajući Općinskog vijeća Ilidža.

Na svečanoj sjednici dodijeljena su i priznanja “Zlatna plaketa” zaslužnim pojedincima i kolektivima. Dobili su: Ratni vojni invalidi, “Organizacija porodica šehida i poginulih boraca”, Namjenska industrija FAMOS, JU Prva osnovna škola, JU Peta osnovna škola, JU Osmo osnovna škola, JU Deveta osnovna škola, Hebibović Alija (posthumno), Rahman Kasim (posthumno), prof. dr. Memić Senaid načelnik, Muhović Džeko, Bašalić Vahidin, Rimac Darko, Gadžo Senad, Berilo Irhad, Handžić Ibrahim, Jašar Aziz, Trgo Adnan, Omerbegović Nurko, Hujdur Ešref, Imamović Šemso, Bilalović Salem, Šulović Ramo, dr. Šaćić Džana, dr. Leto Hasan, Muzur Adnan.





Općina iz Budžeta izdvojila 1.096.000 KM za sanaciju škola

Općina Ilidža dodijelit će 1.096.000 KM osnovnim i srednjim školama za sanaciju i adaptaciju objekata na području ove općine. Tim povodom načelnik Općine Ilidža prof. dr. Senaid Memić potpisao je sa direktorima osnovnih i srednjih škola 01. augusta 2016. godine Sporazum o dodjeli sredstava.

Iz Budžeta Općine Ilidža dodijeljeno je za Prvu osnovnu školu 190.000 KM, za Drugu 40.000 KM, za Treću 190.000 KM, za Četvrtu 80.000 KM, za Petu 70.000 KM, za Šestu 92.000 KM, Osmu osnovnu školu "Amer Čenanović" 50.000 KM, za Devetu 47.000 KM i za Desetu osnovnu školu 7.000 KM. Za Četvrtu gimnaziju izdvojeno je 91.000 KM dok je Srednja tehnička škola grafičkih tehnologija dobila 89.000 KM. Katolički školski centar dobit će 75.000 KM, a Osnovna škola El-Manar 75.000 KM.

Načelnik Memić istakao je nadu da će škole sredstva utrošiti na najbolji način, čime će se steći bolji uvjeti za učenje učenicima koji pohađaju te ustanove.

"Najbolji dio našeg društva su naša djeca. Najpotrebniji dio je kvalitetno obrazovanje. Iako nemamo nadležnost imamo obavezu. Ovo je investicija koja će se isplatiti i stoga čista srca i na najbolji način želimo ova sredstva usmjeriti za stvaranje boljih, savremenijih uvjeta za učenje, ravnih onima u svijetu. Ovo nisu male pare, kažu da smo ova sredstva mogli uložiti za neke infrastrukturne projekte, ali smatramo da sve treba da čeka i da je ovo prioritet. Želimo da naša djeca budu primjer svima onima kako se ulaganjem u obrazovanje vraća samo dobro lokalnoj zajednici", izjavio je načelnik Memić.

Hamid Guska predsjednik Aktiva direktora osnovnih škola sa područja općine zahvalio je načelniku Memiću i Općinskom vijeću na izdvojenim sredstvima.

"Ovo je nastavak jedne odlične saradnje sa načelnikom Općine Ilidža i Općinskim vijećem i podvlačim da imamo sreću jer nam je načelnik iz branše obrazovanja. Većina škola zahtjeva sanaciju i ova sredstva ćemo utrošiti najbolje što umijemo i možemo", dodao je Guska.

"Izražavam zahvalnost i sreću što je Općina Ilidža izdvojila značajna sredstva za odgoj i obrazovanje. I drago mi je što smo u ovom projektu i mi Katolički školski centar. Školu je osnovala Vrhbosanska nadbiskupija i pohađa je više od 500 učenika iz svih djelova Kantona. Za nas je ogromna suma 75.000 KM i iskoristit ćemo ova sredstva za sanaciju sanitarnih čvorova i sanaciju unutarne i vanjske stolarije", izjavio je Mario Ćosić, ravnatelj Katoličkog školskog centra "Sveti Josip".

Ministar za obrazovanje, nauku i mlade KS Elvir Kazazović pohvalio je odluku Općine Ilidža o dodjeli sredstva za sanaciju obrazovnih institucija.

"Raduje nas odluka Općinskog vijeća i Općinskog načelnika da značajna sredstva ulože u sanaciju obrazovnih institucija i da će škole riješiti goruće probleme. Nadamo se da su sredstva raspodijeljena pravilno. Želim ujedno da pohvalim saradnju sa Općinom kad je u pitanju izgradnja Sedme osnovne škole, jer smo zajednički u ovom projektu koji je u završnoj fazi", izjavio je ministar Kazazović.

Općina Ilidža i ove godine dala 100.000 KM Domu zdravlja

Načelnik Općine Ilidža prof. dr. Senaid Memić i direktor JU Dom zdravlja Kantona Sarajeva Fuad Husić, 4. augusta 2016. u Općini Ilidža potpisali su Sporazum o namjenskom korištenju sredstava za nabavku ultrazvučnog aparata Službi za radiolosku i UZV dijagnostiku i nabavku opreme Centru za fizikalnu rehabilitaciju za potrebe Organizacione jedinice Dom zdravlja Ilidža. Iz Budžeta Općine Ilidža za ove namjene izdvojeno je 100.000 KM.

Načelnik Memić izrazio je nadu da će se obezbijediti sredstvima poboljšati zdravstvene usluge stanovnicima općine Ilidža.

"Mi smo donijeli odluku da izdvojimo sredstva, ali nismo se mješali oko nabavke potrebne opreme jer vjerujemo da će Dom zdravlja Ilidža po prioritetima to i raditi. Zadovoljni smo saradnjom sa Domom zdravlja i očekujemo da 100.000 KM podigne zdravstvene usluge na jedan veći nivo. Želimo biti najbolji i stalno idemo u tom pravcu jer nam je cilj zadovoljni korisnici usluga" izjavio je načelnik Općine prof. dr. Senaid Memić.

Direktor JU Kantona Sarajevo Fuad Husić zahvalio je Općinskom načelniku i Općinskom vijeću na donaciji i izrazio nadu da će se nastaviti dobra saradnja i ubuduće.

Dr. Đana Šaćić, direktorica OJ Dom zdravlja Ilidža smatra da je donacija rezultat dobre saradnje.

"Ja se prije svega želim zahvaliti načelniku prof. dr. Senaidu Memiću, Općinskom vijeću ali i kompletnoj općinskoj administraciji koja nam stoji na raspolaganju i pruža bezrezervnu podršku. Ovakva saradnja može se ostvariti jedino međusobnim uvažavanjem, dobrim analizama i prepoznavanjem potreba naše lokalne zajednice", rekla je dr. Šaćić





Svečano otvorena nova saobraćajna traka u Otesu

Presjecanjem vrpce 26. augusta svečano je u promet puštena nova saobraćajna traka izlaz iz naselja Otes na Ilidži, koja se nalazi kod potputnjaka i ulice Barska i Bosanskih Gazija. Ovo je još jedan projekat od velikog značaja kako za mjesnu zajednicu Otes tako i za općinu Ilidža. Izgradnjom ove saobraćajne trake stanovnici ilidžanskih naselja Otes i Pejton dobit će izlaz i ulaz na zapadni prilaz u pravcu grada, čime će se smanjiti saobraćajna gužva kroz centar Ilidže, a građani ova dva naselja će brže i jednostavnije odlaziti u grad. Izgradnju ove saobraćajnice čija vrijednost iznosi 350.000 KM finansirala je Općina Ilidža, a izvođač radova je bila firma

EURO ASFALT.

„Kada smo prije tri godine planirali ovaj projekat, svi su nam govorili da ne može, a evo danas ga svečano otvaramo. Ovo je dokaz da sve što se počne i završi se. U projektu je učestvovalo mnogo pojedinaca i institucija i ja im se ovom prilikom zahvaljujem na njihovom doprinosu u izgradnji ove ceste. Ovo je prvi od 50 sljedećih projekata ove i slične vrste koje ćemo realizovati u narednom periodu“, kazao je načelnik Memić.

Saobraćajnicu su svečano pustili u promet načelnik Općine Ilidža prof. dr. Senaid Memić, direktor Direkcije za puteve Kantona Sarajevo Nermin Drnda, predsjedavajući Općinskog vijeća Ilidža Muhamed Omerović i direktor Zavoda za planiranje Kantona Sarajevo Hamdija Efendić.

Novih 300.000 KM za regulaciju Zujevine

Sporazum o sufinansiranju projekata: Izvođenje radova šeste faze regulacije korita rijeke Zujevine obostrano od

profila (P-6 do P-2) u dužini od 130 metara na lokaciji Bosanska Blažuj potpisan je 30. augusta 2016. u Općini Ilidža. Sporazum su potpisali načelnik Općine Ilidža prof. dr. Senaid Memić i ministar privrede Kantona Sarajevo dr. Muharem Šabić.

Ministarstvo će ovim sporazumom finansirati radove u iznosu 300.000 KM. Izvođač radova bit će firma Mevludin Comerc.

“Sporazum potpisujemo na osnovu Programa provođenja mjera korištenja i uređenja poljoprivrednog zemljišta u inundacionim područjima u skladu sa programom Vlade za ovu godinu. Taj program finansiramo sa 600.000 KM a za šestu fazu regulacije korita Zujevine izdvajamo 300.000 KM sa Općinom Ilidža, koja je nosilac borbe protiv poplava u Kantonu Sarajevu i nadamo se da ćemo u narednim godinama biti u prilici da izdvajamo još veća sredstva za ove namjene“, izjavio je ministar Šabić.

“Mi želimo da Ilidža bude mjesto gdje je ugodno živjeti, bez opasnosti od poplava. Na Zujevini je u toku već šesta faza i 130 metara sigurne regulacije korita će biti urađeno. Općina Ilidža je spremna i dodatno finansirati ako budu veći troškovi od planiranih ovim sporazumom.

Želimo da sigurnost i imovina građana budu zaštićena i nadamo se da će građani koji su strahovali od kiša živjeti bez straha od poplava” rekao je, između ostalog načelnik Memić.



Denis Zvizdić i Fadil Novalić posjetili Općinu Ilidža

Predsjedavajući Vijeća ministara BiH Denis Zvizdić i premijer Vlade Federacije BiH Fadil Novalić posjetili su 3. augusta Općinu Ilidža. Načelnik Općine Ilidža prof. dr. Senaid Memić upoznao ih je sa aktuelnostima na području ove općine i razvojnim potencijalima sa kojima raspolaže ova lokalna zajednica.

“Svi potencijali koje imamo trebaju biti u funkciji razvoja države i otvaranje novih radnih mjesta“, podcrtao je na sastanku načelnik Memić.

Zvizdić i Novalić izrazili su zadovoljstvo radom Općine Ilidža, koja je ostvarila značajne rezultate u razvoju, posebno privrede i turizma, te čestitali načelniku na uspješnom radu i dobroj organizaciji u pružanju usluga kako stanovnicima općine Ilidža tako i privrednim subjektima.



Načelnik Memić razgovarao sa ministrom Kurićem

Načelnik Općine Ilidža prof. dr. Senaid Memić i ministar kulture i sporta u Vladi Kantona Sarajevo Mirvad Kurić razgovarali su 23. augusta o unapređenju saradnje u oblasti kulture. Načelnik Memić je istakao da je podrška ministarstva do sada bila loša i da je ovo prilika da se poboljša, te istakao da je ministar Kurić prvi koji je finansijski podržao organizaciju Festivala narodne muzike „Ilidža“. Na sastanku je razmotrena mogućnost filmskih projekcija sa Sarajevo Film Festivala na Ilidži. Ministar Kurić je obećao punu podršku u uspostavljanju što bolje saradnje općine i ministarstva u oblasti kulture.



Predsjedavajuća Skupštine KS Ana Babić i direktorica Narodnog pozorišta Marijela Hašimbegović posjetile Općinu Ilidža

Predsjedavajuća Skupštine Kantona Sarajevo Ana Babić i direktorica Narodnog pozorišta Sarajevo Marijela Hašimbegović posjetile su 24. augusta Općinu Ilidža i tom prilikom sa načelnikom Općine Ilidža prof. dr. Senaidom Memićem razgovarali o uspostavljanju još bolje saradnje između Općine i Kantona Sarajevo u svim oblastima, a posebno o očuvanju bosanske tradicije i kulturne baštine i mogućnostima korištenja Ljetne pozornice na Ilidži za kulturne sadržaje s ciljem promovisanja kulture. Načelnik Memić se ovom prilikom zahvalio Ani Babić na saradnji i doprinosu u organizaciji Festivala narodne muzike „Ilidža“.

Direktorica Narodnog pozorišta je upoznala načelnika o projektu postavljanja na scenu opere „Zmaj od Bosne“ Asima Horozovića, koja je u pripremi i mogućnosti da učenici sa područja općine Ilidža posjete ovu muzičko-scensku predstavu u cilju edukacije o istoriji BiH kroz umjetnost.



Delegacija općine Ejup u posjeti Općini Ilidža

Delegacija Općine Ejup iz Turske, predvođena načelnikom Remzi Aydinom 13. jula 2016. godine posjetila je Općinu Ilidža. Goste iz Turske primila je u ime načelnika pomoćnica načelnika za finansije Azra Stambolić.

Na sastanku su razmijenjena mišljenja i razmotreni mogući oblici saradnje između ove dvije općine. Stambolić je upoznala goste sa razvojnim mogućnostima Općine Ilidža i prezentirala im potencijale kojima ova lokalna zajednica raspolaže, kako bi pronašli najbolje načine za buduću saradnju, prvenstveno u oblasti razvoja ekonomije i privlačenja investicija.

Inače, delegacija je u BiH boravila povodom godišnjice obilježavanja stradanja u Srebrenici i ukopa 127 žrtava te su ovom prilikom istakli da će i iduće godine doći 11. jula. Bili su dirnuti razmjerama tragedije koja je zadesila Bosnu a posebno Srebrenicu. Sljedeće godine prema riječima načelnika Aydina oni će doći sa turskim studentima i širit će istinu o stradanjima u BiH.



Delegacija Općine Karesi gosti Općine Ilidža

Delegacija Općine Karesi – Belikesir iz Turske boravila je u BiH. Tim povodom 14. jula 2016. godine u Općini Ilidža upriličen je sastanak sa rukovodstvom ove lokalne zajednice, na kojem je razgovarano o mogućnostima buduće saradnje između ove dvije općine.

Delegaciju koju je predvodio načelnik Yucel Yilmaz, u ime načelnika prof. dr. Senaida Memića, Haris Gudić, savjetnik načelnika, upoznao je sa razvojnim mogućnostima općine i prezentirao im potencijale kojima ova lokalna zajednica raspolaže, kako bi pronašli najbolje načine za buduću saradnju, prvenstveno u oblasti razvoja ekonomije, turizma, obrazovanja, sporta i kulture.

Kako je kazao načelnik turske općine Karesi, koja broji 170.000 stanovnika razlog posjete je historijska veza, koju imaju BiH i Republika Turska. "Polazeći od veze koju već imamo mišljenja sam da imamo mnogo sličnosti i u ostalim segmentima, iako se radi o dva naroda. U tom smislu nadam se da ćemo u mnogim aspektima naći zajednički interes, te da ćemo dogovoriti projekt koji možemo realizirati", izjavio je načelnik turske općine Keresi Yucel Yilmaz, te pozvao domaćine da dođu 13 augusta u ovu općinu kad se tradicionalno održavaju sportske igre, takmičenje u hrvanju.

"Ovdje ste uvijek dobrodošli jer vas mi smatramo svojim prijateljima. Mi smo četvrta općina po razvoju u FBiH. Stalne ankete koje provodimo govore i da su naši sugrađani zadovoljni aktivnostima koje provodimo, a sa vama smo spremni realizirati razne projekte od sporta pa do infrastrukture", rekao je Gudić.

Inače, ovo je druga posjeta ove općine, Općini Ilidža. Poslije simbolične razmjene poklona gosti su obišli Ilidžu i upoznali njene prirodne ljepote.





Festival narodne muzike "Ilidža 2016" je u toku pet večeri od 3.-7. augusta opravdao očekivanja kako učesnika tako i gostiju i posjetilaca. Svih pet noći pjesma je pružila ugođaj za sve one koji su došli na Ilidžu, ali i sve one koji su program pratili putem TV-a. Interes posjetilaca je bio veliki te se za svaku noć tražila stolica više. Iako je bila kiša na večeri "Velikani narodne muzike" ni ona nije omela gledaoce da horški pjevaju sa Terezom Kesovijom, Duškom Kulišem, Hankom Paldum, Enesom Begovićem, Adnanom Jakupovićem, Semirom Cerićem Koketom, Nadom Obrić... Pjevale su se na Ljetnoj pozornici Al pamtim još, Ti meni lažeš sve, Dugo te dugo očekujem... i brojni drugi hitovi koji su nekad obilježili čuveni ilidžanski festival, a čije pjesme traju i do danas. Zvuci tradicionalne narodne pjesme sa scene ilidžanskog festivala privlačili su slučajne prolaznike koji su željeli uživo slušati i gledati sve šta se dešava na pozornici.

Posebna noć, je svakako bila noć kada je izvedeno 15 takmičarskih numera narodne muzike koje je komisija izabrala na osnovu konkursa. Gosti večeri su bili Nedžad Salković, Neno Murić, Slađa Hodžić i Bahrija Hadžialić.

"Kad pjevaš sevdalinku, moraš da je maziš, voliš, da je nikako ne povrijediš. Njeni organi su toliko lijepi, ali i teški za recitiranje. Kada pjevate stihove sevdalinke, kada recitirate njene riječi ne treba upotrebljavati previše trilera jer ona to ne traži, ona to ne želi", rekao je Nedžad Salković, princ bosanskog sevdaha, koji se obratio na početku takmičarske noći.

Načelnik Općine Ilidža prof. dr. Senaid Memić je u toku svih pet večeri u svom obraćanju isticao želju da Ilidža treba da bude i ostane mjesto gdje se širi pozitivna energija, nada, sreća i ljubav, sve ono što i čini sevdalinku. A kao domaćin načelnik Memić je uručio nagrade



i to za najbolji tekst Zaimu Poturiću, za najbolju muziku i najbolji aranžman Aidu Husrefu, najboljem izvođaču Minelu Spahoviću. Posebna nagrada je bila za pobjedničku pjesmu „Iliđanskog festivala 2016.“ a to je bila pjesma "Sunce" u izvedbi Amne Aganović.

Važno je reći i da su se u protekle četiri noći na sceni smjenjivali mladi autori, interpretatori, najbolji harmonikaši, veliki narodne muzike.

Na drugoj noći Festivala narodne muzike Iliđza 2016. pod nazivom "Prva harmonika BiH", 4. augusta 2016. pobijedio je 18-godišnji Haris Kaltak iz Sarajeva.

Na Ljetnoj pozornici svaka harmonika pokušala je prenijeti emocije pjesama i onih koji su je izvodili. Osam finalista ocjenjivao je stručni žiri u sastavu: Edo Krilić, Slobodan Vidović i Ante Filipović.

Osim što se pobjednik okitio titulom najbolji harmonikaš BiH, predstavnica kompanije SIWA i FIGI Ivana Stanojlović uručila mu je i nagradnu harmoniku.

Zadnja noć, 7. augusta bila je rezervirana za sve one koji vole pjevati narodnu muziku, ali nisu do sada imali prilike pjevati na velikoj pozornici. Javljali su se i pjevali svi koji su željeli jer je to bio i cilj kako kaže sam naziv manifestacije "Pjevaj narode, gdje god da si..."

Karaokama je završen ilidžanski festival, a Općina Iliđza se nada da će nastaviti tradiciju održavanja festivala i da će se na Iliđzi pjevati pjesme koje će ostati u srcima brojnih ljubitelja muzike.

*Pobjednica
festivala
Amna Aganović*

Započeli radovi na uređenju Male aleje

Započeli su radovi na uređenju šetnice Male aleje. Izvodit će se radovi na uređenju i popločavanju Male aleje na potezu od Rustempašine do ulice dr. Mustafe Pintola, kao i radovi na podzemnim instalacijama. Već dugi vremenski period Općina Ilidža planira da provede aktivnosti na uređenju centralnog dijela Ilidže, shodno usvojenoj strategiji te je u tom pravcu u prošloj godini provela proceduru raspisivanja konkursa za izradu idejnog rješenja Male aleje. Nakon toga naručena je izrada izvedbenog projekta koji je uradila firma Argentarija. Prema provedbenoj proceduri javne nabavke izvođač je firma Bosman d.o.o Sarajevo. Vrijednost radova 700.000 KM. Prema usvojenoj dinamici završetak radova se očekuje za 60 dana. Radove finansira Općina Ilidža.

Vrlo bitno opredjeljenje Općine Ilidža u postupku izrade idejnog projekta uređenja Male aleje bilo je kulturno-historijsko i prirodno obilježje kao ideja vodilja. Posebna pažnja kod planiranja uređenja bila je posvećena



organizaciji prostora i zadovoljenju funkcionalnih zahtjeva u samom prostoru, očuvanju postojećeg zelenila i projektiranje novog u skladu s klimatskim uvjetima i namjenskom prostoru, kao i racionalnost i ekonomičnost u cjelini.

Asfaltirane ulice Nikole Šopa i Šamin gaj

Na području općine Ilidža završeni su radovi rekonstrukcije kraka ulice Nikole Šopa na dužini od 200 metara. Urađena je i rekonstrukcija ulice i kišni kolektor za odvodnju površinskih voda sa saobraćajnice dužine pet metara. Investitor je Općina Ilidža, izvođač radova Braća Mujić d.o.o., a vrijednost radova je 63.906,00 KM. U MZ Rakovica završeni su radovi rekonstrukcije ulice Šamin gaj na dužini od 250 metara, širine 3,5 metra. Investitor je Općina Ilidža, izvođač radova OXA doo, a vrijednost radova 29.280,00 KM.



Završeno asfaltiranje sedam ulica

Na području općine Ilidža završeno je asfaltiranje sedam ulica dok je u toku asfaltiranje još dvije ulice. Iz Budžeta Općine izdvojeno je za ove namjene 295.126,00 KM.

Ulica Četvrte Viteške brigade dobila je novi izgled. Asfaltirana je u dužini od 260 m, širine šest metara. Investitor je Općina Ilidža. Izvođač radova Braća Mujić d.o.o., a vrijednost radova iznosila je 61.500,00 KM.

Završena je i rekonstrukcija ulice Dr. Silve Rizvanbegović u dužini od 130m i širine šest metara. Radove u vrijednosti 33.400,00 KM finansirala je Općina Ilidža, a izvodila firma Braća Mujić d.o.o.

U toku je rekonstrukcija ulice Sabita Užičanina u dužini od 105 metara i širine 4,5 metra. Investitor je Općina Ilidža. Izvođač radova: Braća Mujić d.o.o. Vrijednost radova iznosi 29.280,00 KM.

Stanovnici ulice Bare kod Stupa dobili su novi asfalt u dužini od 140 metara i širine 5,5 metara.

Općina Ilidža je finansirala radove u iznosu 17.460,00 KM. Izvođač radova bila je firma OXA d.o.o.

U toku je rekonstrukcija ulice Čamila Marića u dužini od 140 metara i širine pet metara. Općina Ilidža finansira

radove, a izvodi ih Beton Fresh d.o.o. Vrijednost radova je 22.500,00 KM.

Okončana je i rekonstrukcija ulice Dr. Ševale Zildžić Iblizović u dužini od 160 metara i širine četiri metra. Investitor je Općina Ilidža. Izvođač radova Beton Fresh d.o.o. Vrijednost radova iznosi 13.500,00 KM.

Završeni su i radovi asfaltiranja ulice Dr. Avde Sućeske u dužini od 130 metara i širine 4,5 m. Općina Ilidža je za ove radove utrošila 24.300 KM, a radove su izveli radnici firme Beton Fresh d.o.o.



Vodosnabdjevanje Rakovice prema planu


Realizacija projekta vodosnabdjevanja Rakovice teče prema planu. Odvija se u dvije faze Prva faza obuhvata završetak vodosnabdjevanja oko 80 posto naselja Rakovica, druga faza preostali dio (padinski dijelovi) naselja iznad 630 metara nadmorske visine. Završetak realizacije izgradnje prve faze planiran je 2016. godine nakon toga slijedi realizacija druge faze. Trenutno se izvode radovi na izgradnji sekundarne vodovodne mreže na Kobiljači i izrada kućnih priključaka u uli-

cama Kakrinjski put i Kobiljača. Do kraja godine oko 1.720 objekata će se priključiti na vodovodnu mrežu u naseljima Kešelji, Šamin Gaj, Rakovica centra, Stanjevac, Kakrinje, Zenički potok, Rakovica selo, Božići, Rukodol, Vidovci, dio Rudnika, Kobiljača. Sva naselja mogu imati vodu po završetku obje faze izgradnje vodovodnog sistema. Do sada je uloženo oko 17.500.000,00 KM, a finansirala je Općina Ilidža, Kanton Sarajevo, privrednici sa područja Rakovice i građani. Građani su učestvovali sa 800 KM za izgradnju dijela sekundarne vodovodne mreže i izgradnje kućnog priključka.



Početak radova na deminiranju lokaliteta Mitrčići

U Mjesnoj zajednici Blažuj, 22. jula 2016. godine započeli su radovi na deminiranju lokaliteta Mitrčići kojim će biti obuhvaćeno područje u površini od 2.000.000 kvadratnih metara, što je najveći poslijeratni projekat ove vrste u Bosni i Hercegovini. Projekat se finansira udruženim sredstvima Općine Ilidža i Vlade SAD. Izvođač radova je Udruženje „Centar za obuku pasa za otkrivanje mina“ iz Sarajeva, a završetak radova planiran je za četiri mjeseca.



Postavljeno 28 ležećih policajaca

Postavljanje prinudnih usporivača vozila, tj. ležećih policajaca bili su zahtjevi gotovo svih savjeta mjesnih zajednica.

Tako je u Općini Ilidža postavljeno 28 ležećih policajaca, i to oko svih osnovnih škola i vjerskih objekata, a na četiri lokacije postavljene su i vibra trake.

Vibra trake postavljene su kod škole u Pejtonu, u ulici 13. juni, kod bivšeg kina Igman i u ulici Stari drum u Kovačima.

“Osnovni cilj projekta je zaštititi najmlađe učesnike u saobraćaju i osigurati im siguran put do škole”, rekli su nam u Službi za investicije, razvoj i komunalne poslove Općine Ilidža.

Vrijednost investicije je 30.000 KM.



Sjećanje na heroje s Golog brda

U sklopu obilježavanja 24 godišnjice formiranja Četvrtre viteške motorizovane brigade 28. jula 2016. godine, zvaničnici, preživjeli saborci, porodice šehida na čelu sa komandantom Četvrtre viteške brigade generalom Fikretom Prevrljakom obišli su i položili cvijeće na mjesto stradanja Emira Bogunića – Čarlija, sestara Samire i Mevlide Elčić i Džemaila Bulbula na Golom Brdu.

O herojstvu Čarlija, sestara Eličić i Džemaila Bulbula govorio je njihov ratni kolega Šerif Kereš koji je naglasio da se nikad ne smiju zaboraviti ova četiri heroja, kao ni svi oni koji su dali život za BiH. Prisutnima se obratio i načelnik Općine Ilidža prof. dr Senaid Memić ističući da preživjeli koji grade državu za koju su oni dali živote moraju složno raditi.

“Ovdje treba da bude spomenik i treba da se posjećuje uvijek i odaje počast. Moramo čuvati od zaborava tako što ćemo djecu učiti historiju, ali mi preživjeli moramo raditi složno. Izgraditi državu po mjeri svih”, rekao je između ostalog načelnik Memić, predlažući da se zajedno radi na ideji izgradnje žičare do Golog brda.

Emir Bogunić – Čarli, bio je komandir voda Četvrtre motorizovane brigade i jedan od najistaknutijih boraca. Poginuo je 28. jula 1993. godine na Golom brdu na Igmanu. Najvišim ratnim priznanjem “Zlatni ljiljan” odlikovan je 1993. godine, a posthumno je 1994. godine odlikovan “Ordenom za vojne zasluge sa zlatnim mačevima” i proizveden u čin pukovnika Armije RBiH. Bosanske heroine sestre Mevlida i Samira koje su izbjegavši iz Dervente, preko Hrvatske došle da brane Sarajevo a na Golom brdu poginule. Mevlida je posthumno odlikovana “Zlatnim ljiljanom”. Džemail Bulbul je istinski heroj koji je poginuo s puškom u rovu u akciji oslobađanja Golog brda.

Potom su brojne delegacije položile cvijeće na mezarima Emira Bogunića – Čarlija i Ejuba Sarajkića – Eke u parku ispred Doma kulture u Hrasnici. Supruga Ejuba Sarajkića, Šemsa, rekla nam je da joj je ovaj mjesec najtužniji u godini.

“Svake godine je sve teže i teže. Prošla je dvadeset i jedna godina od pogibije ali mene jednako boli. S obzirom da je bio dobitnik Zlatnog ljiljana često me posjete iz općine i to mi puno znači. Drago mi je da nisam zaboravljena”, rekla nam je Šemsa Sarajkić, supruga Ejuba Sarajkića Eke. Amir Džino pripadnik Četvrtre viteške brigade prisjetio se svojih poginulih boraca, rekavši da su to bili ljudi hrabrog srca.

“Čarli je bio vođa. Za njega nije postojao problem za sve je imao rješenje. Volio je timski raditi. Bio je ponos svih nas”, rekao je Džino.

Tom prilikom proučena je Fatiha i Jasin dova.

Obilježena godišnjica stradanja djece u Hrasnici

Udruženja logoraša Općine Ilidža, kao organizator događaja, uz podršku Općine Ilidža 12. jula 2016. godine organizovalo je obilježavanje godišnjice stradanja djece ispred spomen-obilježja u parku u Hrasnici pod nazivom “Da se ne zaboravi i ne ponovi”. Udruženja roditelja ubijene djece opkoljenog Sarajeva 1992-1995., predstavnici Općine Ilidža, boračkih udruženja, rodbina i prijatelji proučili su Fatihu i položili cvijeće na mjesto stradanja nevine djece, te odali počast žrtvama. “Ubijanjem djece ubijala se budućnost našeg naroda. Na ovaj dan 1992. godine od ispaljene minobacačke granate 82 mm sa lokaliteta stadiona u Vojkovićima u parku u Hrasnici, ranjeno je četvero i ubijeno četvero djece. Rejon odgovornosti odakle je ispaljena granata je “Druga lahka brigada” pod komandom Milana Majkovića. Za ovaj zločin i mnoge druge još niko nije odgovarao niti je procesuiran. Živimo u sadašnjem vremenu koje moramo iskoristiti da se ti zločinci pronađu, procesuiraju i kazne. To bi bila satisfakcija za žrtve, njihove porodice i kompletan bošnjački korpus. To se mora uraditi zbog budućnosti ovih prostora, dijaloga, tolerancije, suživota i mira”, izjavio je Enes Đelilović, predsjednik Udruženja logoraša Općine Ilidža. Tog kobnog dana ubijeno je četvero djece i to: Azmir Brodarac (1976.), Sanela Hadžiomerović (1979.), Aldina (1979.) i Admir (1985.) Čolpa.

Obilježena godišnjica „Bitke za Famos“

U organizaciji Udruženja porodica šehida i poginulih boraca Ilidža i Općine Ilidža, 4. avgusta 2016. g. u naselju Lasica u Hrasnici u prisustvu članova porodica poginulih, saboraca i općinskih zvaničnika, obilježena je 24. godišnjica „Bitke za Famos“ u kojoj je poginulo 27 boraca 104. viteške motorizovane brigade Armije Republike Bosne i Hercegovine. Brojne delegacije i članovi porodica šehida i poginulih boraca položili su cvijeće ispred spomen-obilježja u Lasici, spomen-obilježja u Hrasnici i mezarju Kovači-Hrasnica gdje je proučena i Jasin dova.

Bitka za Famos je jedna od najznačajniji bitaka koje su se odvijale te sudbonosne 1992. godine, bitka koje se moramo sjećati zbog velikog broja poginuli.

„Danas smo tužni, ali i ponosni na one koji su dali svoje živote za odbranu ideje, slobode, svoje porodice, svojih domova i oni su samo u jednom danu zaslužili Dženet. Svojim dolaskom i prisustvom iskazujemo svoje poštovanje prema ovim žrtvama, svoju spremnost da se i sami žrtvujemo za one koji dolaze. Nadam se da ćemo odavde otići plemenitiji i da ćemo ovaj dan nositi u srcu“, kazao je u svom obraćanju načelnik Općine Ilidža prof. dr. Senaid Memić.



Bajramski prijem za porodice šehida

Povodom Ramazanskog bajrama i Dana šehida u Općini Ilidža upriličen je tradicionalni prijem za 50 porodica šehida, čiji su članovi poginuli ka pripadnici Armije Republike Bosne i Hercegovine. Porodice je primio načelnik Općine Ilidža prof. dr. Senaid Memić sa saradnicima. Članovima šehidskih porodica uručene su hedije u iznosu po 100 KM. U svom obraćanju porodicama šehida načelnik Memić zahvalio se svima što su došli, čestitao im Bajram i istakao da je ovo prilika da se vide i porazgovaraju o problemima nazivajući susrete prilikom da se razumiju i pokušaju više učiniti jedni za druge kako bi bol za najmilijim bar malo ublažili.

Marš mira Ilidža-Nezuk-Srebrenica

Gorska služba spašavanja i Streljački klub Ilidža u saradnji i pod pokroviteljstvom Općine Ilidža sedmu godinu zaredom organizuju Marš mira Ilidža-Nezuk-Srebrenica. Ovogodišnji učesnici, njih 87 krenuli su autobusom do Nezuka ispred zgrade Općine 7. jula 2016. godine. Sretan put i dobro zdravlje na ispraćaju zaželio im je načelnik Općine prof. dr. Senaid Memić sa saradnicima. Sudionici marša su se u Nezuku pridružiti ostalim učesnicima marša odakle su nastaviti put prema Memorijalnom centru u Potočarima, gdje su 11. jula prisustvovati kolektivnom ukopu i dženazi žrtvama genocida.



Uspješan Marš mira

Gorska služba spašavanja i ove godine pod pokroviteljstvom Općine Ilidža uspješno realizovao projekat pohod Marš mira 2016 godine. Broj učesnika Marša mira za ovu godinu iznosio je blizu 100.

Ove godine njima su se pridružili prijatelji iz Turske koji su pješaci do Potočara. Ekipa GSS ih je pratila sa kompletnom logistikom. Kako su rekli iz Gorske službe, Marš mira je uspješno protekao i bez ijednog incidenta.

Peti moto maraton Srebrenica 2016

Moto klub „Suburb's Riders“ Ilidža organizovao je i ove godine peti po redu Internacionalni moto maraton Srebrenica 2016 pod nazivom „Da se ne zaboravi i ne ponovi“ posvećen godišnjici srebreničke tragedije. Učešće je uzelo preko 350 motorista iz Bosne i Hercegovine, Hrvatske, Slovenije, Švedske, Austrije, Švicarske, Njemačke, Turske, Libije i Italije koji su se 10. jula 2016. godine okupili na parkingu ispred Energoinvesta na Ilidži, gdje je obavljeno akreditiranje učesnika, podjela majica i lunch paketa, nakon čega su u pratnji policije krenuli na defile kroz grad gdje su se zaustavili i položili cvijeće na spomen obilježje Djeca Sarajeva, zatim su krenuli prema Memorijalnom centru Potočari. I ove, kao i predhodne godine Općina Ilidža finansijski je podržala ovu humanu manifestaciju. Učesnike Moto maratona ispratio je načelnik Općine Ilidža prof. dr. Senaid Memić i zaželio im sretan put za Srebrenicu.



Prijem za Dženitu Klico

Načelnik Općine Ilidža prof.dr. Senaid Memić primio je 9. augusta 2016. godine reprezentativku BiH u bacanju kugle, koja će nastupiti na Paraolimpijskim igrama u septembru u Rio de Janeiro, Dženitu Klico.

Tom prilikom načelnik Memić poželio joj je uspjeh na Paraolimpijskim igrama u Brazilu i uručio joj novčanu pomoć.

Standardna reprezentativka BiH Dženita Klico je trostruka prvakinja BiH, učesnik na Paraolimpijskim igrama u Kini 2008. a ovo će biti drugo njene učestvovanje.

Dženita je osvajačica 17 zlatnih medalja sa domaćih i međunarodnih turnira.

Inače, Dženita Klico je Ilidžanka i načelnik Memić je posebno izrazio zadovoljstvo što će naša sugrađanka predstavljati između ostalog i Ilidžu na Paraolimpijskim igrama u Brazilu.



Prijem za učesnike festivala folklor



Načelnik Općine Ilidža prof. dr. Senaid Memić 5. avgusta 2016. godine upriličio je prijem za učesnike Sedmog međunarodnog dječijeg festivala folklor „Ilidža“ i Prvog međunarodnog festivala folklor za djecu i mlade „Čuvari tradicije“.

„Čast mi je i zadovoljstvo biti domaćin ova dva festivala folklor za djecu sa ovolikim brojem zemalja učesnice. Ilidža postaje centar folklor u regionu. Nadam se da će publika na Ilidži uživati u vašim igrama. Želim vam ugodan boravak u našoj općine i uživajte u njenim ljepotama, družite se i dođite nam i sljedeće godine“, kazao je načelnik Memić u svom obraćanju učesnicim festivala.

Gosti nisu krili svoje zadovoljstvo učešćem na festivalima, a posebno su zadivljeni ljepotom Ilidže i Bosni Hercegovini. Gosti i domaćini razmijenili su poklone, kaom znak pažnje i sjećanja na ovaj susret.

Nagrađeni vlasnici najljepšeg dvorišta i balkona

Izbor najljepšeg dvorišta i balkona u Općini Ilidža za 2016. bio je povod prijema kod Općinskog načelnika prof. dr. Senaida Memića 26. jula, kada im je uručio novčane nagrade.

“Želim da se zahvalim svim učesnicima, koji su podržali ovu akciju, svojom voljom, znanjem, željom i trudom uljepšali izgled naše općine. Dvorišta, cvijetne balkone i prozore obišla je komisija, koja je sve zabilježila fotografijom, te su odlučili i odabrali najbolje među svim takmičarima. Vaš trud doprinosi da imamo uređenije mjesto življenja. Nagrade su simbolične, one sigurno nisu motiv, ali očito je da je ljudima drago da se to priznanje vidi i da se ljudi pohvale javno. Ja im čestitam i zahvaljujem što su sudjelovali u ovoj akciji i iskreno se nadam da će ovo pobuditi interesovanje narednih godina”, poručio je načelnik Općine Ilidža prof. dr. Senaid Memić. Prvu nagradu za najljepše uređeno dvorište i nagradu u iznosu od 500 KM dobio je Mehmed Kuloglija, drugu Hamdo Lokvančić i iznos 400 KM, a treće Željko Čolo 300 KM. U konkurenciji najljepši balkon koji je zavrjedio trud i estetiku je balkon Enise Kečo koja je dobila 300 KM, drugi je Mejre Fajić i nagrada u iznosu 200 KM, a treći Memnune Lokvančić koja je nagrađena sa 100 KM.



“Riječ nije samo slovo na papiru 2”

Općina Ilidža objavila je publikaciju “Riječ nije slovo na papiru 2” sačinjenu od faksimila i tekstova objavljivanim u printanim medijima. Kroz prezentirane faksimile zabilježen je rad Općinskog načelnika i općinske administracije koji na najbolji način potvrđuju rad i realizaciju zacrtanih ciljeva i programa sačinjenih u Strategiji razvoja Općine Ilidža.

U publikaciji je istaknuto da se Općina Ilidža prema podacima Federalnog zavoda za programiranje razvoja (FZZPR) a prema indeksu razvijenosti među deset najrazvijenih općina i to na četvrtom mjestu. Jednako tako po izvještaju Zavoda za statistiku BiH je bila najposjećenija turistička destinacija u BiH sa najvećim brojem turista te najvećem brojem noćenja u 2015.

“Nevjerovatno je koliko je ova knjiga, druga po redu, u riječi i slici potvrđuje definiciju da se društvena morfologija odnosi na demografiju i geografiju seoskih i gradskih centara. U knjizi je zastupljena i društvena morfologija koja pokriva društvo iz vana: ulice, zgrade, vodovode, infrastrukturu, saobraćajnice, fabrike, privredu, ekonomiju, industriju ali i društvena fiziologija koja pokriva društvo iznutra kroz dječije vrtiće, obdaništa, škole, biblioteke, čitaonice, fakultete, univerzitete i dinamične međuljudske aktivnosti. Nije uzalud davno sažeto, a jasno i precizno kazano, civilizacija je jednako komunikacija. Da je civilizacija jednako komunikacija



vjerodostojno i nepobitno svedočanstvo je Općina Ilidža unazad zadnjih 10 godina sa dva dinamična inovativna vizionarska i kompetentna načelnika, rahmetli Amerom Čenanovićem i prof. dr. Senaidom Memićem. Oni potvrđuju staru mudrost da je blagodat u kretanju i pokretu i da je prava dobrota za ljudstvo pogotovo Općinu znanje u akciji.

Sadašnji načelnik koji je naslijedio Amera Čenanovića, s kojim je bio najbliži saradnik, prof. dr. Senaid Memić je učinio jedan izuzetan inovativan i originalan potez. Izvršena je anketa među građanima vezana za probleme. Tom anketom stekla se jedna direktna, demokratska, višeslojna, raznorodna i obuhvatna slika odnosa, procesa i problema a potreba. Tako je Ilidža postala Općina dinamike, neprestanog pokreta, razvoja, komunikacije i susretanja ljudi”, napisao je između ostalog recenzent knjige prof. Mustafa Spahić.



Održan Četvrti festival mladih „Volonterijada“

Mladi Crvenog križa Ilidža organizovali su Četvrti festival mladih „Volonterijada“ koji je održan od 19. do 21. 8. 2016. godine na Ilidži. U okviru festivala prvog dana održan je turnir u odbojki za djevojke i muškarce na kojem je učestvovalo šest ekipa. Pobjedila je ekipa „Jalijaši“ iz Ilijaša.

Drugog dana održan je turnir u malom fudbalu na kojem je učestvovalo devet ekipa a pobjednici su momci iz ekipe „Ipswich“ i trećeg dana održane su Igre bez granica na obali rijeke Željeznice na kojima su se takmičile četiri ekipe u disciplinama skakanja u vrećama, trka sa jajima, streljaštvu i drugim zabavnim igrama. Učesnici festivala su bili mladi sa područja Kantona Sarajevo, a kao gosti nastupili su i mladi iz Kaknja i Fojnice. Na završetku festivala najboljim su uručene nagrade. Bila je ovo još jedna prilika za razmjenu iskustava i ugodno druženje mladih. Festival je finansirala Općina Ilidža iz bužeta za mlade.

Podijeljeno 20 paketića

Udruženje Zlatna ruka podijelili su bajramske paketiće djeci bez roditelja i djeci romske nacionalnosti. Aktivistice ovog udruženja podijelile su 20 paketića.



Održan sedmi međunarodni dječiji festival folklor

U periodu od 04. do 08. augusta 2016. godine, Ilidža i Sarajevo su bili domaćini i kulturna prijestolnica dječijeg folklornog stvaralaštva iz sedam zemalja. Udruženje za djecu i mlade "Nominativ" Ilidža, uspješno je organizovalo sedmi po redu Međunarodni dječiji festival folklor u saradnji sa Kud "Ilidža" i Kud "Bašćaršija".

Na festivalu je učestvovalo preko 500 mališana iz Albanije, Crne Gore, Moldavije, Makedonije, Srbije, Turske i Bosne i Hercegovine. Cilj festivala je ispunjen a to je okupiti što više djece na jednom mjestu, pod istim krovom i sa istim motom, a to je očuvanje tradicije, razvijanje prijateljstva, kulturnog i socijalnog duha, širenje ljubavi, tolerancije i mira među djecom.

Građani općine Ilidža, kao i svi građani Kantona Sarajevo na Ljetnoj pozornici mogli su uživati u prelijepim nošnjama i igrom koju su nam ponudili učesnici iz navedenih zemalja.

Veliku podršku u realizaciji festivala dala je općina Ilidža na čelu sa načelnikom prof. dr. Senadom Memićem.

